

**ISIZULU ULIMI LOKUQALA LOKWENGEZA: IPHEPHA I**  
**ISIZULU FIRST ADDITIONAL LANGUAGE: PAPER I**

Isikhathi: Amahora ama-2½

Amamaki ayi-100

---

**QAPHELA LOKHU OKULANDELAYO**

1. Leli phepha linamakhasi ayi-17. Qiniseka ukuthi nelakho liphelele.
  2. Leli phepha lineziqephu EZINE.
  3. Phendula zonke IZIQEPHU.
  4. Qala isiqephu ekhasini elisha.
  5. Izinombolo zezimpendulo zakho mazibe njengasephepheni lemibuzo, UNGAZIGUQULI.
  6. Qiniseka ukuthi awuyixovi imibuzo.
  7. Phendula yonke imibuzo ngesiZulu.
  8. Shiya umugqa emva kwempendulo.
  9. Bhala ngokucacileyo nangobunono ukuze kube lula ukumaka umsebenzi wakho.
-

**ISIQEPHU A      ISIFUNDO SOKUQONDISISA****UMBUZO 1**

Funda umbhalo ongezansi bese uphendula imibuzo elandelayo.

**Abafundi bebanga leshumi nanye eMemorandum High School bakhankasela isikhundla sokuba ngumholi wabafundi ngonyaka ozayo.**

**Laba bafundi abathathu abalandelayo abangenele lo mkhankaso (*campaign*) bacelwe ukuthi bethule inkulumo emfishane ehholo ukuze abanye abafundi bazi ngabo kangcono.**


**Bekulindeleke ukuthi bakhulume ngaphansi kwalezi zihlokwana:**

- ***Chaza ukuthi ungubani.***
- ***Umlando wokufunda kwakho kulesi sikole.***
- ***Izinto ezikujabulisayo noma ochitha ngazo isizungu.***
- ***Bhala amagalelo obe nawo kulesi sikole.***
- ***Phawula ngosaziwayo oyisibonelo esihle kuwena.***
- ***Ozokwenza uma uphumelela ukuba ngumholi.***
- ***Ungachaza nokuthi ulindeleni ngomsebenzi wakho.***

**Izinkulumo zabo:**

**1.      USinethemba Mntungwa**

Igama lami nguSinethemba Mntungwa. Ngaqala ukufunda lapha eMemorandum High School eminyakeni eyishumi nanye edlule. Isikhathi sami esiningi ngisichitha lapha esikoleni, ikakhulukazi ngoba ngihlala khona lapha emagcekeni (*premises*) esikole. Abazali bami babona kukuhle ukuthi ngihlale e-boarding ngoba bangabantu abahlale besemsebenzini. Isikhathi esiningi basichitha emazweni angaphandle kwaseNingizimu Afrika ngoba banamabhizinisi okuthutha uphethiloli. Ngiyazifela ngomculo nokudlala ithenisi. Yingakho ngidlala upiyano uma kune-***assembly*** lapha esikoleni. Ngingumholi weqembu lokuqala lesikole futhi ngiphinde ngibe ngumholi weqembu lesifundazwe sakhona lapha e-Gauteng. Ngiyafisa ukudlala ithenisi nami ngihlonipheke njengoSerena Williams ngelinye ilanga.



[<www.google.com>]

Uma nivotela mina nizothola amathuba okuzibonela osaziwayo kwezomculo nabantu bezemidlalo abaphumelelayo empilweni.

## 2. UNhlanhla Ferguson



[<www.google.com>]

NginguNhlanhla Ferguson. Ngingumfundi **oxube ubuhlanga** noziqhenya ngokuphumela obala ngobulili bakhe. Ngiyabonga ngokungamukela ngezandla ezivulekile. Ngifike lapha eMemorandum High School ngizofunda ibanga lesi-8. Ngesikhathi ngiqala ukufunda lapha bekunzima kakhulu ngoba ngaqala ngethemu yesibili, sifunda *online*. Ngakho-ke, othisha nabafundi ngangibabona *online* kuphela cishe unyaka wonke wezi-2020. Kwaba ngcono ngethemu yesithathu ngoba saqala ukuya esikoleni yize sasigqoka izifonyo, singabonani kahle. Ngaqala ngaba **yinkomo edla yodwa** kanti ngiyazithandela ukusebenza nabantu, ikakhulukazi abantu abasha. Yingakho ngiseqenjini le-*Community Service ne-Peer Counselling*. Ngezimpelasonto ngisiza

abafundi bebanga lesi-8 eMbewu Orphanage, ngomsebenzi wabo wesikole. Uma sengimdala ngifisa ukuba nguSonhlalakahle odumile njengo-Mother Teresa, **ongasekho emhlabeni**. Ngizibona ngikufanele ukuba ngumholi wesikole ngoba nginothando lwabantu, ngixhumana ngokushesha nabo futhi angikhethi minyaka, angikhethi bala. Angibheki ukuthi ungena ngaphansi kwabuphi ubulili.

## 3. U-Aphiwe Thusi

Mina ngingu-Aphiwe wakwaThusi. Ngaqala ukufunda lapha ebangeni lokuqala, ngonyaka wezi-2013, ngangiphuma eFrance nomama wami. Ngangingakwazi ukukhuluma isiNgisi ngenxa yokujwayela ulimi lwesiFulentshi. Kwakunzima ukuxhumana nabanye abafundi kanye nothisha ngoba imvamisa babekhuluma isiNgisi. Abantu abaningi babengibuza bethi: "Wena ungowakwaThusi, isibongo sakho esesiZulu. Kungani ungakwazi ukukhuluma isiZulu?" Kwakungiphatha kabi lokhu. Umama nobaba bazalelwa eNingizimu Afrika, hhayi mina! Imiphumela yami yesikole yayisezingeni eliphansi kakhulu ngoba izifundo eziningi kulesi sikole zazifundiswa ngolimi engangingakwazi ukukhuluma. Njalo uma kuphuma isikole ngangisala nothisha wesiNgisi ukuze ngifunde kangcono. Kusukela ebangeni lesikhombisa ngaqala ukuthola [<www.google.com>] izindebe nezitifiketi ezahlukahlukene ngenxa yemiphumela esezingeni eliphezulu. Eminyakeni eyedlule ngiqale ukuphuma phambili kuzo zonke izifundo. Kulo nyaka ngithole i*Honors Academic Blazer* ngase ngikhethwa ukuba ngumholi weqembu le-*Matric Dance Committee*. Mina neqembu lami sizimisele ngokubeka i-*Matric Dance* yalo nyaka ezingeni eliphezulu. Iphupho lami ukusungula inkundla yezokuxhumana emayelana nezemfundo njengoReid Hofman, owasungula i-*LinkedIn*. Mina ngifisa ukusungula inkundla yokuxhumana ezosetshenziswa ngabantu abasha kuphela. Nginekhono kwezobuchwepheshe, ngizolenza leli phupho libe yimpumelelo. Uma ngingaba ngumholi waseMemorandum High School, ngizoqhubeka nginikele (*contribute*) ngisho noma sengiqedile nakumatikuletshe eminyakeni ezayo.






[Umbhalo wokuziqambela]

- 1.1 Phendula ngokuthi YIQINISO noma NGAMANGA.
- 1.1.1 Laba bafundi bafake isicelo sokuba ngumholi womkhankaso. (1)
- 1.1.2 Bonke basebangeni likamatikuletsheeni. (1)
- 1.2 Wafika nini uSinethemba kulesi sikole? Bhala inombolo yeminyaka. (1)
- 1.3 Kungani uSinethemba ehlala esikoleni? (1)
- 1.4 Endabeni kaSinethemba, khipha umusho ochaza ukuthi uthanda izingoma kakhulu. (1)
- 1.5 Yimuphi umfundi owayephuma phesheya kwezilwandle kulaba? (1)
- 1.6 Ukusuka kwalo mfundi oku-1.5 phesheya ezofunda lapha kwaba naziphi izinselelo? Bhala amaphuzu amabili. (2)
- 1.7 Endabeni kaNhlanhla, thola igama **elinomqondo ophikisana** naleli:
- 1.7.1 bekulula (1)
- 1.7.2 nginenzondo (1)
- 1.8 Umuntu onjani oxube ubuhlanga? (1)
- 1.9 Chaza lezi **zimo zokukhuluma**.
- 1.9.1 Inkomo edla yodwa. (1)
- 1.9.2 Ongasekho emhlabeni. (1)
- 1.10 Wena ungumholi wabafundi kulo nyaka. Khetha umfundi oyedwa kulaba bese umnikeza iziyalo ezimbili ngokumtshela ukuthi kufanele enzeni uma ekhethwa ukuba ngumholi wangonyaka ozayo. (2)
- [15]**

**UMBUZO 2**

Bukisisa imibhalo engezansi bese uphendula imibuzo elandelayo.

<b>UMDLALO A</b>	<b>UMDLALO B</b>	<b>UMDLALO C</b>
		
Yenzeka kuphi? America Iqale nini? February 2021 Izethameli: 88%	Yenzeka kuphi? South Africa Iqale nini? May 2020 Izethameli: 85%	Yenzeka kuphi? USA Iqale nini? November 2022 Izethameli: 97%

[<www.google.com/safesearch>]

2.1 Bhala isihloko somdlalo.

2.1.1 Ongasesandleni sakho sobunxele. (½)

2.1.2 Ophakathi kweminye imidlalo. (½)

2.1.3 Ongasesandleni sakho sokudla. (½)

2.1.4 Oqale ukudlala ngonyaka odlule. (½)

2.1.5 Onenani eliphezulu lezethameli. (½)

2.1.6 Owaqala ngenyanga yezithandani. (½)

2.2 Bhala igama '**Wednesday**' ngesiZulu. (1)

2.3 Sinjani isimo sezulu esithombeni somdlalo C? (1)

2.4 **Khetha** inyanga eyodwa kulezi ezisesithombeni, **ibhale** ngesiNgisi bese uyihumusha ngesiZulu. (1)

2.5 Yini efanayo ngale midlalo yonke? Bhala kube kunye. (1)

**[7]**



**UMBUZO 3**

Sebenzisa ikhathuni engezansi ukuphendula imibuzo elandelayo.



- 3.1 Bangaki abantu kulesi sithombe? Bhala inombolo ngesiZulu. (1)
- 3.2 Laba bantu basebenzela yiphi inkampani? (1)
- 3.3 Bhala lokhu ngamagama APHELELE.
  - 3.3.1 Isifundazwe esisodwa esitholakala kule khathuni. (1)
  - 3.3.2 Amadolobha amabili akule khathuni bese ubhala amagama alawa madolobha NGESIZULU. (2)
- 3.4 UMnumzane Truth uthukuthele. Sekela lesi sitatimende ngamaphuzu amabili. (2)
- 3.5 Ngokubona kwakho, kungani uJono evale amehlo? (1)

**[8]****Amamaki angama-30**

**ISIQEPHU B UKUFINGQA****UMBUZO 4**

- Funda le ncwadi bese UYIFINGQA ngamagama **angama-50** kuya **kwangama-60**.
- Bhala amaphuzu AMAHLANU ngemisho ephelele.
- Imisho yakho mayibe nezinombolo kusukela **kweyoku-1** kuya **kweyesi-5** NOMA **amabhulethi**.
- Sebenzisa amagama akho emishweni. UNGABHALI isigaba.
- Bhala kube **yinkulumo mbiko** (*reported speech*).
- Sebenzisa ulimi oluhle.
- Ekugcineni kwamaphuzu wonke owabhalile, bhala INANI lamagama owasebenzisile.

48 River Club Avenue  
Sandton  
2021  
14 kuMasingana 2023

Mhleli  
ISOLEZWE  
P.O Box 233  
SANDTON  
2021

Mhleli

**MUSANI UKUDLALA NGATHI SIKHOKHA IMALI ENGAKA!**

Ngiyisakhamuzi endaweni yaseSandton, eGoli. Ngafika kule ndawo ngonyaka ka 2010, ngenkathi kudlala ibhola lendebe yomhlaba. Ngingazibala lishone liphinde liphume ilanga uma ngingakhuluma ngazo zonke izinkinga ezikule ndawo engikuyona. Yize kunjalo, namuhla ngizokhuluma ngenkinga yokuhamba kukagesi esibhekene nayo lapha eSandton.

Mhleli, nginabantwana abayisithupha, ababili bafunda eNyuvesi abane basafunda isikole. Kungani uhulumeni nenkampani yakwa-Eskom bengazicabangeli izingane zethu? Zolo lokhu besihlaselwe ukhuvethe izingane zifunda zisemakhaya zifunda nge-online. Manje sezijwayele ukusebenzisa ubuchwepheshe kepha azilitholi ithuba elanele lokusebenzisa lobu buchwepheshe ngoba awukho ugesi. Lezi zingane zivuka zigeze ngamanzi abandayo, zidle ukudla okubandayo futhi kuyabanda njengoba nesimo sezulu sisibi kangaka kulezi zinsuku. Ebusuku silala kucime ugesi kumnyama bhuqe! Ekuseni sivuka ugesi ungekho! Uma sibuya sivela emsebenzini nezingane zibuya esikoleni ugesi usuke uphelile. Lizoba njani ikusasa lezwe lethu kulesi simo? Othisha nabo banikeza izingane umsebenzi wesikole ukuze ziwenze ekhaya yize bazi kahle ukuthi ugesi awukho. Mhlawumbe bona bahlale benogesi zikhathi zonke.

Enye inkinga ukuthi uma ngisendleleni eya emsebenzini kuhlale kunezimoto eziningi emgwaqweni. Amarobhothi awasebenzi. Lokhu kudala udweshu ngisho nakubashayeli ngoba uma amaphoyisa engekho ukulawula ukuhamba kwezimoto akulula ukushayela kahle. Uma amaphoyisa ekhona emgwaqweni nakho lokho kunika izigebengu ithuba lokuntshontsha izimpahla zethu emakhaya. Ngikhuluma nje sezingene kabili kulo nyaka zathatha umabonakude wami, izimpahla zokugqoka nokudla efrijini. Isikhathi esiningi amakhamera awasebenzi ngenxa yakho ukuhamba kukagesi. Uhulumeni akaphuthume asifakele amandla kagesi lawa asebenzisa ilanga ukuze inciphe noma kuxazululeke le nkinga.

Mhleli, ngithukuthele ngigane unwabu ngoba uhulumeni nenkampani yakwa-Eskom badlala ngathi. Imali ekhokhwa zinyanga zonke iyaphi? Yenzani?

Liyaphi leli zwe? Yini ezolandela emva kwalokhu? Hhayi! Mayivalwe i-South Africa!

Okhathazekile



uSishingishane Msomi

[Umbhalo wokuziqambela]

### Ekufingqeni kwakho bheka lokhu:

- Imininingwane yombhali nenkinga yakhe.
- Okuthinta umndeni wakhe/ imfundo.
- Umthelela wokuhamba kukagesi.
- Iziphakamiso azibekile.
- Uphatheke kanjani/ uzizwa kanjani njengoba ebhala le ncwadi.

### UKWABIWA KWAMAMAKI

<b>Inggikithi:</b>	Amaphuzu amahlanu akhona futhi enza umqondo.	(5)
<b>Ulimi:</b>	Lusetshenziswe kahle, alunamaphutha.	(2)
<b>Amagama omfundi:</b>	Umfundi usebenzise amazwi akhe.	(1)
<b>Amaphuzu:</b>	Izinombolo noma amabhulethi.	(1)
<b>Inani:</b>	Amagama esephelele angama-50 kuya kwangama-60 futhi abhaliwe.	(1)

**Amamaki ayi-10**



**ISIQEPHU C      IZINKONDLO****UMBUZO 5**

Funda le nkondlo engezansi bese uphendula imibuzo elandelayo.

**Inkondlo A – Efundwe ekilasini**

- 1      Utshiloza wedwana olwandlekazi olukhulu,
- 2      Uvuthuzwa ngumsinga obandayo kodwa awugqwali.
- 3      Ubungazwa yimvelo,
- 4      Kundiza izinyoni zolwandle,
- 5      Phezu kwakho konke ukungathokozi ngawe sekushabalele,
- 6      Konke usuwakushaya indiva.
- 7      Uthe kade uqokelwe ukujivaza nokuthena amandla amaqhawe
- 8      akithi,
- 9      **Wawafukamela kuhle kwesikhukhukazi,**
- 10     Sifukamela amaqanda namatshwele aso.
- 11     Amaqhawe nezingwazi zakwantu zifika kuwe,
- 12     Zigcwele intukuthelo kodwa wena uthela,
- 13     Umoya woxolo nokuzwana wakhe isizwe.
- 14     Iningi lifika kuwe lingakwazi ngisho nokubhala,
- 15     Izipele kodwa baphuma sebengonhlenhle nongqeqhe.
- 16     Kanti ngabe ubahlambisa ngayiphi intelezi,
- 17     Ingani baphuma kube sengathi sebethelwe ngezibonkolo.
- 18     Kanti Robben Island uyini ngempela?
- 19     Ngabe ulije kumbe inyuvesi.
- 20     Bantu baseNingizimu Afrika,
- 21     Ake sihambeni siyobona le nqaba kayitshelwana.
- 22     Amashoshozela akithi asakushiya Robben Island,
- 23     Kodwa udumo lwakho lusabalele umhlaba wonke.
- 24     Usilethele inkululeko,
- 25     Usilethele isithunzi nokuhlonipheka.
- 26     **Namhlanje sidume njengoswidi,**
- 27     Bonke abasezinkingeni bethekela kithi ulwazi.
- 28     Ngabe isele nobani injulalwazi yakho?
- 29     Uligugu kwabaningi,
- 30     Kwabanye uyisehluleki ngoba awuzithenanga amandla izingwazi
- 31     zakithi,
- 32     Kunalokho uzifake umfutho.

- 5.1     Bhala isihloko sale nkondlo. (1)
- 5.2     Hlobo luni **lwezifengqo** ezitholakala emgqeni 9? **Bhala ezimbili.** (2)
- 5.3     Esitanzeni sesibili, tomula umugqa ochaza ukuthi iziboshwa ziphuma kule ndawo imbongi ekhuluma ngayo zinomfutho futhi zinomdlandla. (1)
- 5.4     Ngokwenkondlo, kungani imbongi ibiza laba bantu ngamaqhawe? (1)
- 5.5     Ngamazwi akho, iqonde ukuthini imbongi emgqeni 26? (1)

**[6]**

**UMBUZO 6**

Funda inkondlo engezansi bese uphendula imibuzo elandelayo.

**Inkondlo B – Efundwe ekilasini****INJABULO**

- 1 Maye! wenjabulo kazi ukuphi lapho uzinze khona,
- 2 Ngizwa ngishaywa luvalo kuthi lapho ngiphakama,
- 3 Ngizwe kududuma izimpophoma ngaphakathi kimi,
- 4 Kuye kusho kuqande amanyikwe.
- 5 Kuthi lapho ngithi,
- 6 Ngiyacambalala kusho kugubhe amagagasi esho,
- 7 Ngesankahlu esikhulu ngizizwe sengiqhumisa uhleko,
- 8 Ngingedwa kube sengathi sibaningi **sidla ingevu,**
- 9 **Kuqhuma namahlaya** kanti akunjalo.
- 10 Waze wangenza wenjabulo,
- 11 Usungibukanise nabantu,
- 12 Ingani ubuso bami buhlale buchachambile.
- 13 Ngabe yimi omuhle njengoba sengicwebazela?
- 14 Bengithi ngimnyama kodwa manje sengingamunwe,
- 15 **Isikhumba sami sishelela kuhle kwendoni yamanzi.**
- 16 Ingabe ucashe kuliphi igumbi emzimbeni wami?
- 17 Sengifile ngabantu befisa ukwazi le mfihlo yakho,
- 18 **Phuma bakubone hleze ngidle olubabayo,**
- 19 Usungafunga ukuthi kangisanyatheli kulo mhlaba-
- 20 Omagade ahlabayo.
- 21 Usungafunga ukuthi eyami inyathuko iqale ihlelenjwe,
- 22 Uze ungangihlubuki ungafunga ukuthi esami,
- 23 **Isihlambezo** silandwe kude kanti lutho.
- 24 Ngisho ngibuka izinkomo zakwethi usungafunga,
- 25 Ukuthi zidla ubabe,
- 26 Nensinde kuphela azisayilokothi ingongoni,
- 27 Nazo ngithi uma ngiqhamuka zibhonge,
- 28 Ezinye zikhonye,
- 29 Ngabe kuseyinjabulo yonke le?

6.1 Khetha impendulo efanele.

Imbongi izizwa **[ithokozile, ilambile, ingaphilile]** kule nkondlo. (1)

6.2 Hlobo luni lwezinzwa ezitholakala kule migqa?

6.2.1 Umugqa 15. (1)

6.2.2 Umugqa 18. (1)

## 6.3 Chaza lezi zimo zokukhuluma.

6.3.1 sidla ingevu (8). (1)

6.3.2 kuqhuma namahlanya (9). (1)

6.4 Yini isihlambezo? (1)

6.5 Le nkondlo inezitanga ezinesakhiwo esingajwayelekile. Ucabanga ukuthi kungani? (2)

**[8]**

**UMBUZO 7**

Funda inkondlo engezansi bese uphendula imibuzo elandelayo.

**Inkondlo C – Efundwe ekilasini****DONDOLO LUKAGOGO – Bongani Mavuso**

- 1 Ngikubona uncike odongeni olumidwayidwa,
- 2 Izimfa zelawu lakwethu,
- 3 Zikuqalele kuhle komuhlwa ekabheni.
- 4 Qina nsukuzonke dondolo lukagogo,
- 5 Uqinise amadolo kagogo,
- 6 Ze ezocathula kuhle kosana malanga onke ugogo.
- 7 Intombi yaseMabheleni uyithwale ibuthaka,
- 8 Wayithwala kumnyama kubomvu;
- 9 Nempesheni isiyitholela wena dondolo ongentondolo.
- 10 Ngaphandle kwakho singelithathe igxathu isalukazi sakwethu;
- 11 Ongazi angathi sicinga inaliti emhlabathini ob'thuvibenja,
- 12 Lapho sigqolozele umkhombandlela oqine NKO.

7.1 Tomula amagama **amabili** akhombisa ukuthi le nkondlo ikhuluma ngomuntu wesifazane. (1)

7.2 Yini udondolo? (1)

7.3 Chaza ukuthi udondolo lubaluleke ngani kugogo. (1)

7.4 Hlobo luni lwenkondlo lolu? (1)

7.5 Unjani umoya wale nkondlo? Usho ngani? (2)

**[6]**

**UMBUZO 8**

Funda inkondlo engezansi bese uphendula imibuzo elandelayo.

**Inkondlo D – Engafundwanga ekilasini****NGOKHOHLWA KANJANI? – N. Z. Kheswa**

- 1 Ngokhohlwa kanjani:
- 2 Ngikubona uqiqing' iqoma
- 3 Lomphongolo wokukhohlakala kwami,
- 4 Usikizela bengakunike thuba,
- 5 Uthunyiwe ukuba ummeli wami?
- 6 Ngokhohlwa kanjani:
- 7 Ngikubon' usujuluk' umanzi te,
- 8 Uhlukunyezwa usumapotwe ungaphunyuzwa,
- 9 Uphahlekwa ngozozo bezilonda zami.
- 10 Uzimisele ukuzenza mina!
- 11 Ngokhohlwa kanjani:
- 12 Ushayisw' okwenkab' emasimini,
- 13 Uthwalisw' esikankunzan' isivikela-langa,
- 14 Behleka bekukhomba bebhinqa,
- 15 Ngizipholele ngingazi nanyaka!
- 16 Khona ngingakhohlwa kanjani:
- 17 Ngincengwa mihla namalanga
- 18 Ngikhunjuzwa ngokufa kongenacala
- 19 Engithwalel' isigweb' esingaka!
- 20 Yebo, ngiyaphinda ngiyavuma,
- 21 Yebo, ngiyomdumisa nanini!

- 8.1 Isigqi sale nkondlo siyanensa. Sekela lesi sitatimende. (1)
- 8.2 Thola lokhu enkondlweni.
  - 8.2.1 **Impindwa.** (1)
  - 8.2.2 **Isenzukuthi**, estanzeni sesibili. (1)
  - 8.2.3 Imvumelwano, estanzeni sokuqala nesesithathu. Iwuhlobo luni? (2)
  - 8.2.4 Ukuxhumana estanzeni sesine. Kuwuhlobo luni? (2)
- 8.3 Hlobo luni lwefanamsindo olugqamile **emgqeni wesikhombisa?** (1)
- 8.4 Enkondlweni, thola amagama asho lokhu:
  - 8.4.1 Isilwane (1)
  - 8.4.2 Nsuku zonke (1)

**[10]**

**ISIQEPHU D UKUSETSHENZISWA KOLIMI NOHLELO****UMBUZO 9**

Sebenzisa ikhathuni engezansi ukuphendula imibuzo elandelayo.



- 9.1 Gcwalisa ezikhaleni ukuze kwenze umqondo. **Bhala impendulo eyigama eliphelele.**

UMqhele ugula ngesikhathi **9.1.1** \_\_\_\_\_ (sibi) njengoba nogesi uhamba njalo kulezi zinsuku. Ngo 2018, **9.1.2** \_\_\_\_\_ (thola) ukuthi unesifo sesifuba. Uma **9.1.3** \_\_\_\_\_ shona uzokwenzenjani umfowabo. Phela uSambulo akakwazi ukuphila ngaphandle **9.1.4** \_\_\_\_\_ Mqhele.

(4)

- 9.2 Bhala **isabizwana soqobo** esikhundleni samabizo agqamile. Bhala impendulo kuphela.

9.2.1 Uyagula **umfowethu** bakithi.

(1)

9.2.2 **Isibhedlela** esinjani esingenayo ijenereyitha?

(1)

9.2.3 **Umshini** awusebenzi!

(1)

9.3 Bhala isabizwana **sokukhomba eduze** ngokusebenzisa amagama agqamile.

**Bhala umusho ophelele.**

9.3.1 **Isibhedlela** asinagesi. (1)

9.3.2 **Umshini** awusebenzi kahle. (1)

9.3.3 **Odokotela** abasebenzi namhlanje. (1)  
**[10]**



**UMBUZO 10**

Sebenzisa isithombe esingezansi ukuphendula imibuzo ezolandela.



ULiya uhamba nesoka lakhe. Bajabulile kakhulu ngoba bazochitha isikhathi ndawonye eNgilandi.

[<www.dreamstime.com>]

10.1 Guqula **amagama agqamile** ukuphikisa imisho elandelayo.

10.1.1 ULiya **uyintombazane** ethandwa yisoka layo. (1)

10.1.2 Bona **bazohamba** ngendiza isikhathi eside. (1)

10.1.3 Le ndawo **iphithizela** kakhulu. (1)

10.1.4 **Lihle** izulu lapho beya khona. (1)



10.2 **Khetha isibanjalo** esifanele kubakaki ukuze imisho izwakale kahle. **Bhala impendulo kuphela.**

10.2.1 **[yithina; yibantu; yibona]** abanemali esiya eholidini. (1)

10.2.2 Indawo abaya kuyona yaziwa **[yibona; nguyena; ngubona]** uLiya. (1)

10.3 Bhala **ubumnini** bamagama akubakaki.

10.3.1 UKeegan ugaxa ihlombe (uLiya). (1)

10.3.2 Izimoto (umphakathi) waseNgilandi ziyabiza. (1)

10.4 Bhala **imisho ephelele** ngokusebenzisa izihlanganiso ezikubakaki.

10.4.1 ULiya noKeegan bavakashela phesheya. ULiya noKeegan bafuna ukushaywa ngumoya. **(ngoba)** (1)

10.4.2 ULiya uhamba ngendiza yakusihlwa. Uzofika ekuseni. **(yingakho)** (1)

**[10]**

**UMBUZO 11**

Sebenzisa ikhathuni engezansi ukuphendula imibuzo elandelayo.



[<www.smekenseducation.com>]

- 11.1 Lungisa isiqeshana esingezansi ngokubhala **izimpawu zokuloba/ zokubhala** ezifanele.

igama lami nguayanda nginebhizinisi elikhulu ethekwinini.

(2)

- 11.2 Bhala **ondaweni** abafanele esikhundleni samabizo akubakaki. Bhala impendulo kuphela.

11.2.1 Amakhasimende ahlala (izihlalo) zikanokusho

(1)

11.2.2 Intombazane ifaka i-*shampoo* (ikhanda).

(1)

11.2.3 Kukhona amakhemikhali (ikhabethe).

(1)

- 11.3 **Nciphisa** amagama alandelayo.

11.3.1 izibuko

(1)

11.3.2 amantombazane

(1)

11.3.3 insipho

(1)

- 11.4 Bhala **amabizomuntu** esikhundleni samagama alandelayo.

11.4.1 sebenza

(1)

11.4.2 amabhizinisi

(1)

[10]

**Amamaki angama-30**

**Amamaki esewonke: 100**